

林文忠公政書

會奏穿鼻尖沙嘴疊次轟擊夷船情形摺

奏爲暎國貨船正在具結進口被該國兵船二隻
攔阻滋擾卽經舟師擊逐逃回尖沙嘴窺伺陸
路營盤復經我兵據險俯攻疊次轟擊將尖沙
嘴夷船盡行逐出不使佔爲巢穴現只散泊外
洋不敢近岸臣等仍飭嚴行堵禦一面綏撫良
夷以示

恩威而安貿易恭摺奏祈

聖鑒事竊照暎夷領事義律前因抗違法度當經示

以兵威旋據悔罪求誠已將薏船奸夷盡驅回國其甘結亦經議具惟命案尙未交克臣等以夷情反覆靡常雖已具稟乞恩仍將夷埠兵船暗招來粵名爲護貨恐有奸謀業於前摺

奏明靜則嚴防動則進剿不敢稍示柔弱旋於九月二十八日由驛遞到回摺伏讀

硃批朕不慮卿等孟浪但誠卿等不可畏蕙先威後德控制之良法也相機悉心籌度勉之慎之等因欽此又欽奉

上諭當此得勢之後斷不可稍形畏憚示以柔弱雖
據該夷領事義律浼西洋夷目懇求轉圜但該夷
等詭詐性成外示恐懼内存叵測不可不防著林
則徐等相度機宜悉力籌畫如果該夷等畏罪輸
誠不妨先威後德倘仍形桀驁或佯爲畏懼而暗
布戈矛是該夷自外生成有心尋衅旣已大張撻
伐何難再示兵威林則徐等經朕諄諭諒必計出
萬全一勞永逸斷不敢輕率償事亦不致畏憚無
能也等因欽此

臣等跪誦之下仰見我

皇上先幾洞燭

訓示嚴明數萬里外夷情毫髮難逃

聖鑒臣等服膺銘佩遵守彌虔其特蒙

恩賞呼爾察圖巴圖魯名號並照例

賞戴花翎以副將卽陞先換頂帶之參將賴恩爵等

感激

天恩益圖報効凡在將弁士卒亦皆感奮倍常提臣

關天培督率舟師數月以來常駐虎門二十里

外之沙角礮臺巡防彈壓間赴三十里外之穿

鼻洋面來往稽查近日各國貨船絡繹具結俱
經驗明帶進黃埔喚國貨船中首先遛結者曰
嚙喇亦已進埔貿易其次遛結者曰嚙唧於九
月二十八日正報入口詎有該國兵船二隻於
午刻駛至穿鼻其一卽七月內向九龍滋擾之
吐嚙其一則近來新到之嘩噏硬將已具結之
嚙唧貨船追令折回不得進口提臣關天培聞
而詫異正在查究間吐嚙一船輒先開放大礮
前來攻擊關天培亟令本船弁兵開礮回擊並

揮令後船協力進攻該提督親身挺立桅前自
拔腰刀執持督陣厲聲喝稱敢退後者立斬適
有夷船礮子飛過桅邊剝落桅木一片由該提
督手面擦過皮破見紅關天培奮不顧身仍復
持刀屹立又取銀錠先置案上有擊中夷船一
礮者立刻賞銀兩錠其本船所載三千斤銅礮
最稱得力首先打中吐嚙船頭查夷船制度與
內地不同其爲全船主宰者轉不在船尾而在
船頭粵人呼爲頭鼻船身轉動得此乃靈其風

帆節節加高帆索紛如蛛網皆繫結於頭鼻之上是日吐咄船頭撥鼻拉索者約有數十夷人關天培督令弁兵對準連轟數礮將其頭鼻打斷船頭之人紛紛滾跌入海又奏陞水師提標左營遊擊麥廷章督率弁兵連轟兩礮擊破該船後樓夷人亦隨礮落海左右艙口間有打穿嘩噏船不甚向前未致受創接仗約有一時之久吐咄船上帆斜旗落且禦且逃嘩噏亦隨同遁去我軍本欲追躡無如師船下旁灰路多被

夷礮擊開內有三船漸見進水勢難遠駛而夷船受傷只在艙面其船旁船底皆整株番木所爲且全用銅包雖礮擊亦不能遽透是以不值追勦收軍之後經附近漁艇撈獲夷帽二十一頂內兩頂據通事認係夷官所戴並獲夷履等件其隨潮漂淌者尙不可以數計我師員弁雖有受傷並無陣亡惟各船兵丁除中礮致斃九名外有提標左營二號米艇適被礮火落在火藥艙中登時燃起燒斃兵丁六名繼已撲滅又

有受傷之額外黃鳳騰與受傷各弁兵俱飭妥
爲醫治此次吐嚙等前來尋衅固因前在九龍
被擊意圖報復而實則由於義律與圖賣鴉片
之奸夷暗中指使臣等訪知義律於該國煙土
賣出一箱有抽分洋銀數十圓私邀夷埠兵船
前來以張聲勢每次送給勞金數至巨萬到粵
後全船伙食皆從各貨船湊銀供給無非恃其
船堅礮利以悍濟貪臣等併力堅持總不受其
恫喝所定具結之令雖據義律勉強遵依但不

肯繕寫人卽正法字樣而九月間復有該國富商數人至澳門集議又謂義律但慮人之正法而各商尤慮貨之沒官反覆刁難迄無定議所喜該國猶有良夷如嚙喇噹哪二船屢諭之餘頗知感悟甫與他國夷商一體遵式具結臣等加意優獎冀爲眾夷之倡而義律與該國奸夷恐此結具後鴉片絕不能來遂痛恨該二船之首先遵具愆愚吐噤等兵船與之尋衅生事因嚙喇已進口內無可如何探知噹哪入口之時

趕來追捉適我師在口外彈壓輒敢開礮來攻
是滋擾雖係夷兵而播弄實由義律誠如

聖諭佯爲畏懼暗布戈矛自外生成不得不大張撻
伐經提臣關天培統師攻擊雖已逃竄不遑究
以師船木料不堅未便窮追遠躡則仍須扼其
要害務使可守可攻查該夷船所泊之尖沙嘴
洋面羣山環抱浪靜風恬奸夷久聚其間不惟
藏垢納汙且等負隅縱壑若任其踞爲巢穴貽
患曷可勝言臣等自嚴斷接濟以來已於尖沙

嘴一帶擇要紮營時加防範本意祇欲其畏威奉法仍聽貿易如常原不忍遽行轟擊而乃抗不具結匿不交兇迨兵船出穿鼻被創逃回仍在該處停橈修理實難容其負固又奚恤其覆巢節據派防各文武稟稱尖沙嘴迤北有山梁一座名曰官涌恰當夷船脊背之上俯攻最爲得力當卽飭令固壘深溝相機剿辦夷船見山上動作不能安居乃糾眾屢放三板持械上坡窺探卽經駐劄該處之增城營參將陳連陞護

理水師提標後營遊擊之守備伍通標等派兵
截拏打傷夷人二名奪槍一桿餘眾滾崖逃走
遺落夷帽數頂九月二十九日夷船排列海面
齊向官涌營盤開礮仰攻數次我軍紮營得勢
礮子不能橫穿僅從高處墜下計拾獲大礮子
十餘箇重七八斤至十二斤不等官兵放礮回
擊卽聞夷船齊聲喊叫究竟轟斃幾人因黑夜
未能查數十月初三日該夷大船在正面開礮
而小船抄赴旁面乘潮撲岸有百餘人搶上山

岡齊放鳥槍僅傷兩兵手足被增城右營把總
劉明輝等率兵迎截砍傷打傷數十名刀棍上
均沾血跡夷人披靡而散帽履刀鞘遺落無數
次日望見沙灘地上掩埋夷屍多具初四日夷
船又至官涌稍東之胡椒角開礮探試經駐守
之陸路提標後營遊擊德連將大礮擡礮一齊
回擊受傷而走臣等節據稟報知該處疊被滋
擾勢難歇手當又添調官兵二百名派原任遊
擊馬辰暨署守備周國英把總黃者華帶往會

勦復思該處旣占地利必須添安大礮數位方可致遠攻堅復與提臣挑撥得力大礮六門委弁解往以資轟擊並派熟悉情形之候補知府南雄直隸州知州余保純帶同候補縣丞張起鵬馳往會同新安縣知縣梁星源相度山梁形勢妥爲佈置復札駐守九龍之參將賴恩爵都司洪名香駐守宋王臺之參將張斌亦皆就近督帶兵械移至官涌併力夾擊茲據會稟十月初六日該文武等均在官涌營盤會同商定諸

將領各認山梁安設礮位分爲五路進攻陳連
陞伍通標張斌各爲一路賴恩爵及馬辰周國
英黃者華爲一路德連洪名香爲一路該縣梁
星源管帶鄉勇前後策應哺時夷人在該船桅
上窺見營盤安礮卽各趕裝礮彈至起更時連
放數口打來我軍五路大礮重疊發擊遙聞撞
破船艙之聲不絕於耳該夷初猶開礮抵拒迨
一兩時後只聽伊啞叫喊竟無回擊之暇各船
燈火一時滅息棄旋潛逃初七日天明瞭望約

已逃去其半有雙桅三板一隻在洋面半沈半
浮餘船十餘隻退遠停泊所有蓬扇桅檣繩索
槓具大都狼狽不堪該文武等因夷船尙未全
去正在查探間卽據引水等報稱查有原扮兵
船在九龍被礮打斷手腕之嘑哱喇吐及訪明
林維喜命案係伊水手逞兇之嘑哱喇兩船尙欲
潛圖報復該將領等因相密約故作虛寂之狀
待其前來窺伺正可痛勦果於初八日晡時嘑
哱併嘑哱喇吐兩船潛移向內漸近官涌後船

十餘隻相隨行駛我軍一經瞭見仍分起趕赴五路山梁約計礮力可到卽齊放大礮注定頭船攻擊恰有兩礮連打哆咧船艙擊倒數人且多落海漂去者其在旁探水之夷划一隻亦被擊翻後船驚見卽先折退而哆咧一船尤極倉皇遁去無暇回礮計官涌一處旬日之內大小接仗六次具係全勝惟初八日晚間有大鵬營一千斤大礮放至第四出鐵熱火猛偶一炸裂致斃順德協兵丁二名除與穿鼻洋面陣亡兵

丁及受傷兵內如有續故者一體咨部請卹外
現據新安縣營稟據引水探報吐嚙嘩諭兵船
義律三板暨暎夷未進口大小各船自尖沙嘴
逃出後各於龍鼓簪洲赤瀝角長沙灣等處外
洋四散寄泊查粵省中路各洋爲漢夷通商總
道雖皆可許泊舟亦須察看形勢隨時制馭卽
如道光十四五年間夷船藉稱避風輒泊金星
門該處地屬內洋不得任其逼處經臣鄧廷楨
嚴行驅逐至今不敢進窺年來改泊尖沙嘴祇

於入口之先出口之後暫作停留尙無妨礙今
歲佔泊日久儼有負固之形始則抗違繼且猖
獗是驅逐由其自取並非鮮自我開此次勦辦
之餘於澳門旣不能陸居於尖沙又不能水處
苟知悔悟儘許回頭若義律與吐嚙等尙以報
復爲心則堅壘固軍靜以待之亦自確有把握
不敢輕率畏蕙致失機宜至貿易一事該國之
國計民生皆繫於此斷不肯決然捨去若果嘆
夷憚於具結竟皆歇業不來正咪喇嚙等國之

人所禱祠而求冀得多收此利者與其開門揖盜何如去莠安良而良莠之所以分卽以生死甘結爲斷臣等現又傳諭諸夷以

天朝法紀森嚴奉法者來之抗法者去之實至公無私之義凡外夷來粵者無不以此爲衡並非獨爲暎咭喇而設此時他國貨船遵式具結者固許進埔卽暎國貨船亦不因其違抗於前而並阻其自新於後又如暎國噶喇之船已在口內聞有穿鼻官涌之役難免自疑臣等諭令地方

印委各員諳切開導以伊獨知遵式具結查明
並無鴉片洵屬良吏不惟保護安全且必倍加
優待復經海關監督臣豫堃親至黃埔驗貨特
傳囑喇面加慰諭該夷感激涕零惟噹哪一船
被吐嚙嚇唬之後尙未知避往何處臣等飭屬
查明下落護帶進埔倘吐嚙兵船復敢阻攔仍
須示以兵威總期悉就範圍仰副

聖主綏靖華夷之至意現在沿海間閭照常安貼堪
以上慰

宸懷所有現辦情形謹會同廣東巡撫臣怡良水師提督臣關天培粵海關監督臣豫堃恭摺具

奏伏乞

皇上聖鑒謹

奏

會奏察看暎夷反覆情形遵

旨不准交易摺

奏爲察看暎夷反覆情形仍爲圖賣鴉片起見遵
旨不准交易俾知儆懼並以折服各國夷情恭摺

奏祈

聖鑒事竊照暎咭喇國貨船於九月底正在具結進
口旋被該國兵船二隻攔阻滋擾我兵水陸疊
擊將該兵船及尖沙嘴各夷船盡行逐出外洋
經臣等於十月十六日恭摺具

奏在案嗣承准軍機大臣字寄九月二十三日奉
上諭前後駛回各船難保不潛赴東西兩路冀圖私
銷著卽派員跟蹤偵察嚴飭沿海各營認真防範
至所出切結如果可靠自必漸就肅清儻該夷迫
於勢蹙暫作緩兵之計日後再有反覆卽當示以
兵威斷絕大黃茶葉永遠不准交易俾冥頑之徒
知所做懼等因欽此臣等跪讀之下仰見我
皇上料夷情之反覆

示做懼於冥頑

訓諭周詳彌深欽服查臣等先於收繳煙土事竣當
以此後不許夷人再賣鴉片理應取具遵依是
以飭繕甘結聲明如有夾帶鴉片人卽正法貨
物沒官字樣義律先本抗違迨數月相持屢經
折挫八月內始據稟稱情愿具結惟所寫字樣
尙與新例不符臣等念其畏罪輸誠冀可再加
開導是以將其原遞澳門同知說帖繕錄奏
聞詎該夷陽奉陰違早不出

聖明所料至九月間義律復招夷商數人在澳門集

議彼此推卸刁難此卽反覆之始也該國有噶
喇噹唧二船均遵式具結噶喇先進黃埔而噹
唧船正在入口被義律潛約吐噹兵船將其攔
回以致與師船互相礮擊其爲反覆莫甚於此
且前遞說帖內云毆斃林維喜命案兇手已懸
賞二千圓令人報知至九月底乃將囚禁在船
之夷人五名均欲解回該國照夷例辦理是其
反覆之形不一而足而究其所以反覆之故實
因慣賣鴉片奸夷利心不死前雖已將新煙帶

回夷埠而往來夥黨尙多仍思乘機偷運伊恐
甘結一具性命難逃而義律利其抽分與之朋
比忽恭忽踞皆有譎謀臣等前已傳諭諸夷奉
法者來之抗法者去之暎夷既不遵約束與其
開門而揖盜何如去莠而安良茲蒙

訓諭嚴明尤當恪遵辦理當卽函商粵海關監督臣
豫堃會同出示曉諭自十一月初一日起停止
暎咭喇國貿易除未經停止以前暎夷有將貨
物轉賣與別國夷商者旣據遵式具結查無鴉

片卽係正經貿易業已移步換形尙可不追旣
往當與噶喇等一體准令進口外其餘責成洋
商認明暎國來船一概停其交易所有大黃茶
葉二物查大黃每年出口本屬有限不過附搭
藥材項下暎夷所銷尤少惟茶葉在所必需然
有綠茶黑茶之分暎夷所銷多係黑茶現在嚴
密稽查不使影射偷漏查向來夷船到粵以暎
咭喇爲最多自嚴辦鴉片以來各夷埠均有傳
聞以鴉片出自暎國此後該國買賣可減別國

買賣可增如噠國喘國及單鷹堪峨啦等國歷
年不過偶來一二船本年來者特多是他夷皆
有欣欣向榮之象而咪喇哩國之船現來四十
五隻則比往屆全年之數已有浮多尤見

天朝聲教覃敷並不少此暎咭喇一國而義律之勾
結吐嚙等虛張僑飾玩法營私該國以七萬里
之遙其主若臣未必周知情狀今他國通商如
舊而暎國獨停若該國查察情由係因圖賣鴉
片抗違

天朝新例則內而自知理曲外而顏面何存彼亦不肯容義律等之詭計奸謀以自壞其二百年來之生計也伏思斷絕鴉片首貴杜其來源而杜源總在夷船無他謬巧譬之防守河工鴉片之來如黃水然惟有嚴隄防以禦之紋銀之出如清水然惟有閉牖壩以束之本年以來收繳已化之煙土值銀千餘萬兩人所共知而新來之鴉片半途聞信折回及到粵畏挈運回者訪聞亦復稱是故本年嘆夷來船本較往年爲少今

既發令斷絕該國貿易所有洋商行鋪均不敢
與之私售惟當視其有無悔懼真情再行覈辦
至他國遵照具結進口查無鴉片者已有船六
十二隻並據查報帶來洋錢將及二百萬圓臣
等仍當時刻稽查防其潛代暎夷走私偷賣不
敢因他夷之遵式出結卽遽信爲無他其先已
具結之噹啷一船雖係暎國夷人而早知遵循
法度現被義律等扣留口外日後若求入口仍
當帶進黃埔不宜與觀望營私之他船一例辦

理以示區別至前後駛回各船誠難保不潛赴
東西兩路希冀私銷臣等仍遵

諭旨密派文武跟蹤偵察並嚴飭沿海各營認真防
範總期該夷鴉片無處可售庶使海面肅靜以
仰副

聖主除患保民之至意所有現斷嘆夷貿易緣由謹
會同廣東巡撫臣怡良水師提督臣關天培粵
海關監督臣豫堃合詞恭摺具

奏伏乞

皇上聖鑒訓示謹

奏

曾奏請將高廉道暫駐澳門查辦夷務片

再臣等伏讀

上諭林則徐已放兩江總督現雖專辦此事豈能常
川在粵卽鄧廷楨統轄兩省公務繁多亦不免顧
此失彼仍當通盤籌畫辦理結實俾日後淨絕根
株方稱一勞永逸等因欽此仰見

聖主明示機宜曲體臣工之至意現已遵

旨斷絕暎夷交易由虎門起程回省籌辦善後事宜
竊念徒法不能自行而量材或堪器使自當擇

其扼要俾有治人查各國夷商來粵貿易貨船
俱進黃埔而坐莊商夥多僦居澳門探行市清
帳目固在此而操奇贏通詭秘亦在此是澳門
實爲總匯之區狡窟旣多漢奸因之麇集教猱
升木靡所不爲至西洋夷人雖稱恭順而不耕
不織專恃懋遷罔利之謀變幻百出現經停止
暎夷交易更難保其不私相串囑代運代銷弊
竇一開漏卮依舊不可不大爲之防溯查雍正
八年設香山縣丞一員駐劄澳內之望廈村乾

隆八年又設澳門同知一員駐劄距澳十五里
之前山寨專司夷務布置本極周詳惟近日夷
人變詐多端澳務愈形喫重當此認真釐剔之
際控馭尤貴得人必須官職較大之員方足以
窮竇源而制驕縱查有新授高廉道易中孚儉
約自持能耐勞苦辦事勇敢頗著威名現已交
卸潮州府篆卽赴高廉新任臣等公同商酌擬
卽委令該道暫行駐劄澳門督同澳門同知等
查辦夷務舉凡稽察澳夷額船斷絕喫夷冒混

緝拏漢奸接濟一切責成該員董率辦理其高廉道本任政事較簡儘可包封在澳覈辦惟高廉兩郡秋審向由該道提勘屆期前往不過月餘卽可竣事至澳內棲止之處舊有粵海關監督行署一所係屬空閒可借與該道駐劄以資辦公惟澳門華夷雜處布惠尤貴宣威小事修刑大事修戎實爲事所時有旣經畀以事權卽當予以兵衛查前山寨設有內河水師都司一員帶兵三百六十三名向歸香山協管轄應請

由該道節制遇有緩急聽其調遣高廉道本兼
兵備體制亦屬相符俟整頓一二年後如果諸
夷就範鴉片肅清再將該道撤回高廉以重職
守臣等愚昧之見是否有當謹會同撫臣怡良
附片

奏祈

聖鑒謹

奏

覆奏遵

旨體察漕務情形通盤籌畫摺

奏爲遵

旨體察漕務情形通盤籌畫恭摺覆

奏仰祈

聖鑒事竊

臣

承准軍機大臣字寄七月初四日奉

上諭前據金應麟奏請將漕運事宜量爲變通已有
旨交兩江總督江蘇巡撫等妥議具奏矣著陳燮
裕謙卽將原奏內所指各情節體察情形通盤籌

畫仍俟林則徐到任後再行會商務臻妥善據實具奏將此諭令知之欽此臣因奉差在粵未見金應麟原奏請俟江蘇省將原奏咨到卽當體察籌議先於八月內附片奏

聞在案嗣准署江蘇巡撫布政使臣裕謙鈔錄金應

麟原奏移咨到粵臣細閱奏內所陳查辦六條

處分一條皆辦漕切要之事自應大加整頓力挽積疲而其附片採訪見聞亦不得已而求變通之法惟是漕務勢成積重如醫家之治久病

見證易而用藥難蓋他端政事祇求官與民兩相安而已獨漕務則糧戶輸之州縣州縣兌之旗丁而旗丁領運於南斛交於北則又有沿途開壩與通倉經紀操其短長故弊常相因而事難獨善卽論病根所起南北亦各執一詞以北言南則謂州縣浮收以致旗丁勒索旗丁勒索以致到處誅求而以南言北又謂旗丁旣被誅求安得不勒索而州縣旣被勒索安得不浮收每以反脣相稽鮮能設身處地於是官與民競

丁與官競卽官與官亦各隨其職掌以顧考成而無不相競而凡刁生劣監訟棍包戶奸胥蠹役頭伍尖丁走差謀委之徒亦皆乘機挾制以衣食寢處於漕本圖私也而害公矣本爭利也而交病矣原奏謂近年州縣臨漕規避挾制上司莫可誰何此亦難免之事蓋寬之固不啻教猱升木卽嚴之亦不過掩耳盜鈴各處類然而蘇松爲尤甚蘇松之漕果治則他處當無不治

臣前在蘇省雖厯五次冬漕祇求無誤正供實

不敢言無弊茲奉

諭旨飭議謹憶往時所歷情形與原奏互相參酌分
擬四條或正本清源或補偏救弊或爲補救外
之補救或爲本源中之本源近則先計一時遠
則勉圖經久不揆固陋謹逐條另繕清摺恭呈
御覽伏候

聖裁惟差次未帶案卷竊恐記憶舛訛如蒙
聖明採擇可否

發下署兩江總督

臣

陳鑾署江蘇巡撫

臣

裕謙覈對

案據並將本屆冬漕有無堪以照辦之處斟酌具奏請

旨定奪是否有當謹繕覆

奏伏乞

皇上聖鑒訓示謹

奏謹將籌議漕務四條繕具清摺恭呈

御覽

一議正本清源必使自南至北皆無例外苛求然後可以杜州縣之浮收絕旗丁之勒索要

不能專禁一處故其事極難然果法在必行
則亦不敢因難而阻也臣竊擬一簡便之法
曰縣督幫收緣州縣一經開倉則逐日用度
不勝枚舉不獨幫費繁重已也與其進倉出
倉時日耽延耗費無算何如合收兌爲一事
就糧船爲倉廩查每年重運過後本次總有
減歇及屆造之船先令依限修造一經開漕
先以此船收米回空到後速催修艚接續貯
收收完一船卽取一船關結先開離次州縣

於岸上搭蓋篷廠令花戶斛米交船丁與民相授受而官監之務使平斛響攜顆粒不得浮加其米色之高低胥由州縣持平不任旗丁欺壓蓋在官既無霑染則理直氣壯卽禁止令行不但旗丁無敢刁難卽索規包抗之徒皆可執法從事而小民胥免浮折徵收可決公平矣惟就中窒礙者有三一則舂篩白糧採買糯米一切夫工折耗口袋麻繩向由州縣津貼一則逃亡絕戶廢地老荒向由州

縣墊補一則票冊紙張夫役飯食蓬廠薪燭
向由州縣措辦一收新漕皆無從挹注但能
責州縣以潔已不能責州縣以解囊卽幫費
不花一錢而虧漕悞運之患自若况重船不
能不脛而走又人所共知者乎不得已仍仿
成法而變通之溯查丁代民勞之始每石原
有耗米六斗六升辦運極爲充裕嗣將耗米
劃出四斗起運歸公其餘二斗六升折徵銀
一錢三分由糧道批解倉場衙門以充支放

公用故有二六輕齋之名而丁不與焉又有
篩颺耗米一款每石給二升七合有零專以
貼丁嗣則奏准米歸通倉其貼丁之款由縣
折銀支給復有漕贈一款正耗二米每石贈
銀一錢改兌之米每石贈銀五分原由糧戶
津貼旗丁故謂之贈迨後此款內每石劃出
二十七文分給北壩名曰箇兒錢又於雍正
七年前大學士尹繼善奏准革除江蘇漕弊
每米一石津貼銀六分半歸旗丁半歸州縣

近聞此款專歸丁收凡此皆貼漕之大略或載全書或見部案班班可考今果力辦清漕似須統核倉場經紀以及旗丁州縣每處應得漕務款項實有若干其用度萬不可少者若干徹底查明通盤籌畫凡有可以取資之款各支各用彼此不許侵剋其實在無從設措者卽不得不參酌成法仍著糧戶貼銀蓋完米旣顆粒無浮則糧戶受益不少而縣幫辦公掣肘之處糧戶亦無不周知從前中外

卷八
條陳每有八折收漕之議事多流弊自不可
行若仿尹繼善奏准章程參考歷來成案比
較現在情形則每石酌貼銀三四錢似亦不
難於正可否責令各府州細加察看由司道
議詳督撫分別

奏明予以限制將大小戶一律徵收比之目下完
漕定可減輕過半如縣幫再有婪索糧戶再
有抗延以及後手之尖丁白規之生監惟有
儘法痛辦而已雖然疲幫軍船不得不裁汰

也查江淮興武二幫因無屯田疲名久著然
尙有造費貼息其最不堪者如太倉後幫滁
蘇幫太河二三幫債積巨萬船壞八九不調
劑不能出運卽調劑亦無完膚且孤寡廢疾
之流皆其債主沿河攔索以累百計故津貼
到手卽罄而開行數里卽停索債者認船不
認人謂之黑帳惟船去然後債去雖定例各
幫額船不許缺少然負重灑帶雇募買補與
夫加一免雇亦例內所許通融者與其強留

之而各幫效尤何如酌減之而米歸灑帶抑
或減疲幫之額以添殷幫之船似宜責成糧
道體察辦理勿以原額拘之庶可悉歸完善
矣雖然開壩開纜不得不酌減也查重運挽
過清江浦向稱三閘五壩每船關纜夫錢不
過十餘千至二十餘千爲止嗣因清江一閘
亦難挽放而臨黃各壩復有加添道光二年
前漕臣李鴻賓所定木榜則稱四閘九壩近
年復加至十四壩每處關纜皆以頭二三進

爲差年增一年每船渡黃需錢百餘千至百數十千不等固由水勢湍急而夫頭之乘危勒詐委員之暗地分肥薄人於險實爲可惡欲除其弊先須大減委員留一二實心者專其責成以每日所放船數分勤惰以所放之有無失事核功過其壩座設法減少關纜夫錢悉定其數刊榜曉諭此外沿途各閘亦皆照行如有訛詐立置於法似可以杜其弊雖然候補衛弁不得不甄別也捐納衛官分發

到淮圖差使者無非圖規費耳從前自南而北漕委不過二十餘人迨道光七年奏定重運不得過四十員回空不得過二十八員至十六年又有不得過八十員之奏總由候補人眾難令空閒然與其調劑而累丁何如酌留而汰冗或量其膂力改補營職或按其捐數量改佐雜似亦可以疏通矣雖然通倉使費不得不核實也查通倉經紀以米爲生凡米之好醜斛之贏縮俱不難隨手改移故費

足則稅稗亦珠璣費不足則釜鍾當升合不
獨旗丁惟命是聽卽各省糧道恐亦莫可如
何惟賴本管官爲之裁制而已查糧船有帶
北存公一款本係從幫費內劃出以爲壩費
聞近年存公款銀每不敷用以致壩債愈多
則累丁之故可想似宜准令各幫旗丁於抵
通交米後將經紀有無勒索稟知該管糧道
卽由道彙取丁結逕揭部科一次如有指出
贓款准予查辦按實者寘之重典或可互相

鈐制至賦出於田理宜清丈頃畝以除寄莊
飛灑之弊丁起於屯理宜稽核衛地以裕貼
造贍運之資此亦本源之所應泊而不能期
諸旦夕似當從容以理之者也

一議補偏救弊漕務已成積重若一時不能驟
改亦須補救有方金應麟原奏所陳本已詳
悉茲臣所議有於原奏中融會者有於原奏
外推詳者在縣在幫各有六事一則核舊章
以去太甚也查蘇松糧戶向分大小而收數

因有短長大戶愈占便宜則小戶愈受苛刻
彼此相較有數十等之差於是小戶效尤亦
詭寄於大戶而辦漕愈難矣今雖未能遽令
畫一斷不可過於偏枯該管府州耳目切近
應令確查所屬州縣历年收兌舊章援以爲
準不及者曲在民太過者曲在官隨地隨時
持平核辦至近年祠堂公產假託者多卽義
產息田亦竊善舉之名以遂短漕之計應令
散歸各戶照眾徵完以杜影射有挾制者罪

之總以去其已甚爲主一則治經造以除弊
匿也查近歲完漕不但徵新且多帶舊其中
分年分限各屆完數不同民間要見由單始
可照數完納而闔縣糧戶多者數十萬少亦
十數萬一切完帶之數瑣碎畸零官吏難以
周知不得不假手於里甲莊差統名謂之經
造而若輩居爲奇貨不以實徵戶冊與官不
以易知由單與民私折暗包以完作欠迨至
兌漕緊急硬將短數交官而加貼之多早經

肥已遲悞把持莫此爲甚應令州縣於開漕
之先速將由單散給並將給單日期出示通
諭各糧戶如五日內單未到手許控經造若
單到手而不完納另差查催倘已由經造折
收匿不稟官者一經發覺立辦重罪一則清
訟米以杜抗延也查收漕之事固少持平而
告許之人總非善類無糧而上控則索規可
知有糧而上控則躲_第避可知控案固須審明
正供豈容藉抗應將上控之糧戶由赴訴衙

門押令到倉交完本名下米石始行准理一
則稽丁胥以憑懲蠹也查漕書記書倉差斗
級以及管倉管廩家人皆不能不用若輩莠
多良少非魚肉百姓卽侵盜本官飛串灑米
搬戶掛籌等弊難以枚舉甚且結尖丁而分
肥於後手引訟棍而調處以居閒破案卽逃
浮蹤莫捉應先責令州縣將此等的實姓名
年貫住址並其家屬親丁詳列冊內送該管
府州覆查一有弊端立即捉究如查造不實

捉挈不到惟該州縣是問至總運廳差亦須
裁減並永禁坐倉以免勾結滋弊一則嚴截
串以杜豫虧也州縣闖茸之員閒有漕前先
截板串或挪解下忙錢糧或墊辦修倉鋪底
其串或給書差或付錢鋪無非明虧暗損挖
肉補瘡至臨漕而無所措手矣更有不肖之
員暫時署事將值交卸起將善區美戶截串
先徵此爲營私悞公之尤必須重辦一則消
漕尾以實庫貯也江蘇漕額之大有一縣而

可抵湖南北一省者漕船催開緊急斷不能
守待闔縣疲戶一律至完故州縣墊漕萬不
能已所謂漕尾是也惟其恃有現存未徵之
串得交後任接徵而後任又以新屆錢漕爲
亟未遑兼顧一輾轉間舊串流交久之幾成
廢紙應責令州縣按年分月帶徵二成徵不
足者著賠則雖往復乘除總無五年以外之
漕尾而庫款庶免虛懸至有一種取巧州縣
將短縮太甚之大戶故意不徵留作漕尾移

交者察出特參與大戶一同懲辦庶可示儆
此在縣之六事也其在幫者亦有六事一則
復冬兌以符僨限也查漕船例應冬兌冬開
嗣因節節爲難不能悉符舊制近年疊奉

諭旨統限四月初十以前全數僨至清江渡黃北上
定須凜遵

欽限不得刻逾但冬間若不多兌春間必不能早開
而旗丁慣以米色爲詞停兌議費且其意欲
令米石在縣倉發熱過後始行上船故兌愈

疲而費愈重漕亦愈遲嗣後冬間須儘縣中
所收之米全行兌幫不得任丁刁措庶來春
祇須找兌差可速漕矣一則按兌米以給津
貼也幫費卽不能遽裁而頻歲疊加何以爲
繼惟當欽遵嘉慶二十二年九月所奉

諭旨統以米石多寡按水次舊章酌給津貼作爲一定
限制如再格外需索卽當治罪而給付之法
總惟兌一石之米給一石之費如兌多給少
不依州縣給多兌少不依旗丁有逐日兌單

爲憑自足以昭公允至於未兌以前責在州縣既兌以後責在旗丁歷奉

諭旨嚴明定須敬謹遵守若兌竣之後勒措通關及空船先開隨後趕米皆旗丁誤漕大弊必須重治其罪一則別虛船以昭核實也查加一免雇及輪減存次之船並不受兌出運而仍給與行月苦蓋已屬格外從優豈得復爭津貼應查照從前奏案此項虛船不准混索幫費致全幫延緩開行如違卽當嚴辦一則實

行月以防正虧也查旗丁行月米糧皆計口授食之需升合不容短少乃近聞縣幫串合折乾每船有折米數十石及百餘石不等獨不思沿途食米不足致虧正糧誰執其咎嗣後水次如有此弊縣幫一體治罪一則懲水手以節身工也糧船水手有額雇在船者有遊幫短緯者總之皆克徯之徒或師傳盤踞老堂或頭船勒薦夥黨偶遇風水阻滯卽藉端勒加身工甚至毆丁折艚大爲幫累近年

疊經嚴辦略見歛戢嗣後如有勒加身工之水手卽於所在地方儘法懲創不稍姑息毋使旗丁被累方免悞公一則定輪開以齊跨兌也蘇松等屬向有調幫章程原使酌劑均平而船數米數不能恰合故一縣之米有兼兌數幫者一幫之船又有跨兌數縣者與其按縣全開不如按幫爲便應飭糧道排定日期每縣先輪一幫開行週而復始其跨兌者合輪數縣遂齊一幫以免參差似亦可以速

漕利運此在幫之六事也

一議補救外之補救查原奏片稱兌費斷不能減南糧恐不能來有謂宜於糧船大修時將船改小以一分二即免剝費閘費有謂宜於淮上建廠貯米即令小船運京有謂宜令蘇松常鎮杭嘉湖等府逐年試辦海運仍將兌費提存藩庫此三者皆不得已而求變通之法也臣查中途建倉以利轉盤與古之洛口倉相仿本係成法但核計一廠貯米約五六

百石大者亦止千石以南漕四百萬石計之
每廢貯一千石卽須廢座四千就令減半轉
運二千廢亦不可少經費殊覺浩繁且淮上
逼近河湖亦恐難以擇地若糧船以一分二
過閘旣覺輕靈遇淺又免盤剝誠利運卹丁
之善策然查南漕起運之船約有四千隻其
中本已區分大小江廣之船最大浙次之蘇
又次之綠江廣重運直下長江小船難禁風
浪若江浙之船改小而江廣不改則閘河磨

淺起剝仍費周章且卽江浙之船所載正漕
照例只四百石此外則爲加載負重而又有
例准攜帶土宜自不能強小船以受大船之
載若因改船而船數驟加一倍是欲去累而
累轉增矣且大修較之折造例限尙隔三年
領項亦少三分之一當大修而令其折造丁
必藉口抗延尙有未屆大修者尤不能一律
勒改是一幫之船有大有小旣難稽核而剝
費亦所省無幾是以臣未敢輕議更張也竊

謂三者之中惟海運曾經辦過尙有成案可
循若按候放洋得乘南風北駛春夏二季中
一船必可兩運如以涉險爲慮則沙船往來
關東每歲以數千計水線風信皆所精熟祇
令裝載六七分已合鬆船之數則風暴無虞
也如慮米石出洋易滋影射查南北洋面沙
船鳥船各有所宜本難越駛倘恐萑苻竊發
自應護以舟師且每歲沙船所運關東豆石
雜種不知凡幾奚獨於載米而疑之海運若

行或以官運或以商運或運正供額漕或運採買米石尙當細酌情形另行從長計議惟原奏有將兌費提存藩庫以實庫項之議查道光六年辦理海運雇募沙船每石給價七錢若兌費另提則雇資安出且旣明提兌費又奚能禁止浮收如謂輪年提費補虧正恐一年提存難補節年虧缺若提者自提虧者自虧於事仍恐無濟大抵海運尙屬可行而所以行之者不同設或規費漸增亦與河運

奚擇惟現在河運甚形棘手未卜日後如何
而海道直捷易通亦不敢不豫留地步如蒙
飭令議行容臣到兩江之任再與江蘇撫臣及司道
等詳細籌商會同具

奏請

旨定奪理合聲明

一議本源中之本源臣愚竊維

國家建都在北轉粟自南京倉一石之儲常糜數
石之費奉行既久轉輸固自不窮而經

國遠猷務爲萬年至計竊願更有進也恭查雍正

三年

命怡賢親王總理畿輔水利營田不數年墾成六千餘
頃厥後功雖未竟而當時效有明徵至今論
者慨想遺踪稱道勿絕蓋近畿水田之利自
宋臣何承矩元臣托克托郭守敬虞集明臣
徐貞明邱濬袁黃汪應蛟左光斗董應舉輩
厯厯議行皆有成績

國朝諸臣章疏文牒指陳直隸墾田利益者如李

光地陸隴其朱軾徐越湯世昌胡寶琮柴潮
生藍鼎元皆詳乎其言之以臣所見南方地
畝狹於北方而一畝之田中熟之歲收穀約
有五石則爲米二石五斗矣蘇松等屬正耗
漕糧年約一百五十萬石果使原墾之六千
餘頃修而不廢其數卽足以當之又嘗統計
南漕四百萬石之米如有二萬頃田卽數所
出倘恐歲功不齊再得一倍之田亦必無虞
短絀而直隸天津河閒永平遵化四府州司

作水田之地聞頗有餘或居窪下而淪爲沮
洳或納海河而延爲葦蕩若行溝洫之法似
皆可作上腴臣考宋臣邾亶邾喬之議謂治
水先治田自是確論直隸地方若俟眾水全
治而後營田則無成田之日前於道光三年
舉而復輟職是之故如仿雍正年開成法先
於官蕩試行興工之初自須酌給工本若墾
有功效則花息年增一年譬如成田千頃卽
得米二十餘萬石或先酌改南漕十萬石折

徵銀兩解京而疲幫九運之船便可停追十
隻此後年收北米若干概令覈其一半之數
折徵南漕以爲歸還原墾工本及續墾佃力
之費行之十年而蘇松常鎮太杭嘉湖八府
州之漕皆得取給於畿輔如能多多益善則
南漕折徵歲可數百萬兩而糧船旣不須起
運凡漕務中例給銀米所省當亦稱是且河
工經費因此更可大爲撙節上以裕

國下以便民皆成效之可卜者至漕船由漸而減

不慮驟散水手之難而漕弊不禁自除絕無
調劑旗丁之苦

朝廷萬年至計似在於此可否

飭下廷臣及直隸總督籌議酌辦之處伏候

聖裁

會奏遵

旨宣布暎夷罪狀並設法驅逐該國船隻出口摺
奏爲暎夷於禁斷貿易之後旋又具稟乞恩經 臣
等嚴行批駁堅與之絕現復欽遵

諭旨列其罪狀宣布各夷並設法驅逐該國船隻出
口恭摺

奏祈

聖鑒事竊 臣等於十一月二十九日承准軍機大臣
字寄奉

上諭林則徐等奏轟擊夷船情形一摺覽奏均悉嘆
咭喇國夷人自議禁煙之後反覆無常前次膽敢
先放火礮旋經剴諭僞作恭順仍勾結兵船潛圖
報復彼時雖加懲創未卽絕其貿易已不足以示
威此次吐噠夷船復敢首先開放大礮又於官通
地方占據巢穴接仗六次我兵連獲勝仗並將尖
沙嘴夷船全數逐出外洋該夷心懷叵測已可概
見卽使此次出具甘結亦難保無反覆情事若屢
次抗拒仍准通商殊屬不成事體至區區稅銀何

足計論我朝撫綏外夷恩澤極厚該夷等不知感戴反肆鴟張是彼曲我直中外咸知自外生成尙何足惜著林則徐等酌量情形卽將喫咭喇國貿易停止所有該國船隻盡行驅逐出口不必取具甘結其毆斃華民兇犯亦不值令其交出喫咭喇一船無庸查明下落並著出示曉諭各國列其罪狀宣布各夷俾知喫夷自絕天朝與爾各國無與爾各國照常恭順仍准通商倘敢包庇喫英潛帶入口一經查出從重治罪其沿海各隘口並距夷埠

不遠之各海島均著林則徐等相度機宜密派員
弁兵丁嚴加防護毋稍疎懈等因欽此臣等跪讀
之下仰見我

皇上乾綱獨斷震疊諸蕃

訓示嚴明俾有遵率下忱感慄莫可名言當卽恭錄
諭旨咨會提臣關天培欽遵辦理伏查暎夷自呈繳

煙土以後種種違玩反覆無常總因賣煙奸夷
冀留後路若使稍爲寬假適足墮其詭謀是以
商同定議欽遵前奉

諭旨自十一月初一日起停止該國貿易業於十一月初九日具

奏在案嗣於十一日該夷義律遣人前赴沙角礮臺向提臣呈遞夷稟一件由提臣咨送前來臣等公同折閱內稱實心欲求承平無不肅敬天朝律例又稱茲時所求惟欲仍作正經貿易凡事欽遵

大清律例等語雖欲明其奉法究係一片空言臣等度其此次具稟懇求仍不過如八月間僞作輪

誠伎倆當以現今

奏明封港不與爾國交易皆由爾之自取並非

天朝無故絕人爾不悔悟於前此時懇求已晚等語

嚴切批示仍咨會提臣飭令提標中軍遣令引

水傳諭去後復思暎夷貨物久貯在船易於壞

爛今聞停止貿易竊恐影射圖銷而各國夷商

利其運腳抽分難保不無私行夾帶又經嚴諭

洋商傳知各國夷人不准代爲轉運進口並責

成洋商將進口貨物詳細辨認如敢扶同含混

卽行加重治罪迄今二十餘日該夷巡船貨船
停泊長沙灣等處外洋雖風浪靡常仍遷延未
去此封港一月以來之實在情形也茲復祇奉
訓言當卽欽遵出示曉諭臚其罪狀宣布各夷俾知
聖明用惠用威惟其自取旣以絕奸夷之望亦以安
良賈之心至於該國貨船停泊外洋本未進口
茲聞

天威震怒自當警懍回帆惟奸夷之夾私者固仍冀
售私卽良夷之載貨者亦未肯棄貨裹衷觀望

勢所必然諒非空言所能諭遣臣等再三計議
惟有嚴查影射以絕其銷貨之心廣緝奸徒以
斷其售私之路先之以文告繼之以兵威使其
計無復之必將窮而思返若敢始終留戀卽何
惜搗穴焚巢惟外洋遼闊異常仍不得不審度
機宜加以慎重此又臣等悉心籌議之梗概也
抑臣等更有請者當粵東准通貿易之時載煙
夷船尙且游奕各洋分投圖賣茲粵港旣經禁
止該夷無可希圖而其售私牟利之心未必卽

能盡泯竊恐改裝艍板由黑水夷洋越赴各路
潛圖銷售除粵省東西兩路業經飭行沿海鎮
協營寨併力巡查州縣文員嚴防口岸以杜偷
運外其沿海各省以福建爲最近浙江江蘇次
之應請

敕下各直省督撫一體嚴行防堵以絕去路所有喚
夷貿易業已封港並遵

旨籌議緣由謹會同廣東巡撫臣怡良廣東水師提
督臣關天培合詞恭摺具

奏伏乞

皇上聖鑒訓示謹

奏